

BOSNA I HERCEGOVINA
Federacija Bosne i Hercegovine
Tuzlanski kanton
OPĆINA GRAČANICA
OPĆINSKO PRAVOBRANILAŠTVO GRAČANICA

RAZMATRA:
Općinsko vijeće
Gračanica

**IZVJEŠTAJ O RADU
OPĆINSKOG PRAVOBRANILAŠTVA
ZA 2017. GODINU**

Gračanica, maj 2017.godine

Na osnovu člana 35. a u vezi sa članom 40. Zakona o pravobranilaštvu ("Sl.novine Tuzlanskog kantona", broj 4/04, 5/08 i 2/14), člana 49. stav 4. Statuta Općine Gračanica ("Sl.glasnik Općine Gračanica" broj 4/09), Općinski pravobranilac, podnosi:

**IZVJEŠTAJ O RADU
OPĆINSKOG PRAVOBRANILAŠTVA
ZA 2017. GODINU**

**1.) UVODNE NAPOMENE I ZAKONSKI STATUS OPĆINSKOG
PRAVOBRANILAŠTVA:**

Ovaj izvještaj se odnosi na period od 31.12.2016. do 31.12.2017. godine, te su istim obuhvaćena sledeća pitanja: uvodne napomene i zakonski status Općinskog pravobranilaštva, unutrašnja organizacija, kadrovska struktura, obezbeđenost sa sredstvima i utrošak sredstava potrebnih za rad, pregled stanja predmeta po pravnim oblastima rada, ocjene stanja i prijedloga mjera za otklanjanje uočenih problema u radu.

Skupština Opštine Gračanica je svojom odlukom o osnivanju br.01-023-7/72 od 22.11.1985. godine, osnovalo i formiralo Opštinsko javno pravobranilaštvo u Gračanici koje je na ovaj način istupilo iz ranije osnovanog zajedničkog Javnog pravobranilaštva u Doboju, te prvi put otpočelo svoj rad kao organ Opštine Gračanica.

Odlukom Općinskog vijeća br. 01-023-7-43/98 od 05.03.1998. godine a na temelju novog Zakona o pravobranilaštvu («Sl.novine Tuzlansko-podrinjskog kantona», br.6/96") osnovano je Općinsko pravobranilaštvo Gračanica koje pod ovim nazivom kao poseban organ predviđen Zakonom i Statutom Općine Gračanica izvršava svoje zakonske obaveze.

Prma Zakonu o pravobranilaštvu («Sl.novine Tuzlanskog kantona», br.4/04",5/08 i 52/14) Općinsko pravobranilaštvo je poseban organ općine, koji preuzima zakonom određene mjere i pravna sredstva radi pravne zaštite imovine i imovinskih interesa Općine Gračanica.

Općinsko pravobranilaštvo svoju funkciju vrši samostalno u skladu sa Ustavom, a na osnovu zakona, drugih propisa i općih akata.

Općinsko pravobranilaštvo vrši poslove pravne zaštite imovine i imovinskih interesa Općine Gračanica i njenih organa. Ono, također, vrši poslove pravne zaštite imovine i

imovinskih interesa pravnih lica, koje, po zakonu osniva Općina Gračanica, ako je to aktom o osnivanju predviđeno.

Općinsko pravobranilaštvo pruža stručnu pomoć državnim organima, ustanovama, i drugim pravnim licima koja osniva Općina Gračanica, u skladu sa odlukom o osnivanju, u rješavanju imovinsko-pravnih pitanja.

Navedeni organi i pravna lica dužni su pribaviti pravno mišljenje Općinskog pravobranilaštva prije zaključenja ugovora o: kupoprodaji, zamjeni, zakupu, prijenosu na privremeno ili trajno korišćenje stvari, uz naknadu ili bez naknade, koncesiji, građenju i udruživanju sredstava za građenje, statusnim i ugovornim oblicima povezivanja preduzeća (društava), kao i kod drugih ugovora kojima se pribavljaju stvari ili raspolaze stvarima, odnosno materijalnim pravima, a zaključene ugovore imovinsko-pravne prirode navedeni organi i pravna lica dužni su dostaviti Općinskom pravobranilaštvu u roku od 15 dana od dana zaključenja ugovora.

Funkciju Općinskog pravobranilaštva vrši Općinski pravobranilac i njegov zamjenik. Općinskog pravobranioca i njegovog zamjenika imenuje Općinsko vijeće, a smjenjuje na prijedlog Općinskog načelnika.

Općinski pravobranilac se imenuje na četiri godine i može biti ponovo imenovan. Zamjenik pravobranioca se imenuje za vršenje dužnosti bez ograničenja trajanja mandata.

Sredstva za rad Općinskog pravobranilaštva se osiguravaju u budžetu Općine Gračanica.

U skladu sa zakonom na zgradi Općine Gračanica, gdje je sjedište Općinskog pravobranilaštva je istaknuta tabla sa nazivom Općinsko pravobranilaštvo Gračanica, sa grbom BiH, FBiH i Tuzlanskog kantona te Općinsko pravobranilaštvo ima prijemni štambilj i pečat.

U Općinskom pravobranilaštvu je ustrojen rad pisarnice, formirana potrebna evidencija predmeta, upisnici, te uređena arhiva predmeta, te je rad pisarnice usklađen sa Zakonom o pravobranilaštvu i Pravilnikom o poslovanju i vođenju evidencija u Pravobranilaštvu Ministra pravde Tuzlanskog kantona broj 06/1-021-467/98 od 23.07.1998.godine.

Na osnovu Pravilnika o službenoj legitimaciji Općinskog pravobranioca Gračanica br.02-05-116-148/01 od 18.04.2001. godine, sadašnjem Općinskom pravobraniocu je pod br.1313/07 od 13.03.2007. godine izdata službena legitimacija.

U uvodnim napomenama radi potpunijeg razumjevanja izvještaja ukratko treba naglasiti krupne promjene koje su se dogodile u organizaciji pravosuđa u našoj zemlji koje su se direktno odrazile i na rad Općinskog pravobranilaštva.

Naime krajem 2003. godine okončana je reforma sudske vlasti u BiH, koja se ogleda u uspostavi manjeg broja sudova sa manjeni brojem sudija, reizboru sudija i reformi

zakonodavstva koji je okončan donošenjem novih procesnih zakona, a to su Zakon o krivičnom postupku i Zakon o parničnom postupku. Ovi zakoni su doneseni kako bi se povećala efikasnost rada pravosuđa, što se odnosi na procesne zakone i da bi se Krivični zakon modernizovao i prilagodio zahtjevima trenutačnog stanja i zakonima u demokratskim državama u svijetu.

Međutim, neovisno od promjena procesnih zakona odnosno od činjenice da sudovi u budućnosti imaju manje posla u jednom predmetu, nužno je istaći da smanjenje broja sudija neminovno je dovelo do zastoja u rješavanju predmeta koji nisu završeni u sudovima, odnosno tužilaštvima prije donošenja novih procesnih zakona. Trenutno imamo situaciju da se po novom procesnom zakonodavstvu, predmeti pred sudovima i tužilaštvima rješavaju znatno brže nego ranije ali da sudovi i tužilaštva imaju ogroman broj zaostalih neriješenih predmeta.

Provedene reforme su direktno uticale i na rad Općinskog pravobranilaštva na taj način što svi predmeti zatečeni kod sudova do donošenja novog Zakona o parničnom postupku, kod kojih nije okončana glavna rasprava, su faktički vraćeni u procesnom smislu na početak i za sve njih se zakazuju nova pripremna ročišta.

Indetična situacija je i sa predmetima koji su nakon reizbora sudija predati u rad novoimenovanim sudijama.

2.) UNUTRAŠNJA ORGANIZACIJA I STRUKTURA ZAPOSLENIKA

Na osnovu čl.74. i 75. Zakona o državnoj službi u FBiH (»Sl.novine FBiH«, br.29/03, 23/04, 39/04, 54/04, 67/05, 8/06 i 4/12), čl.34. i 40. Zakona o Pravobranilaštvu (»Sl.novine TK«, br. 4/04, 5/08 i 2/14), i dopisa Agencije za državnu službu FBiH br. 01-05-34-103/04 od 03.11.2004. god., Općinski pravobranilac je donio Pravilnik o unutrašnjoj organizaciji i sistematizaciji radnih mjesta u Općinskom pravobranilaštvu Gračanica, pod brojem Op-22/04 od 16.11.2004. godine.

Prema pravilniku Općinsko pravobranilaštvo Općine Gračanica je poseban organ Općine Gračanica, koji svoju funkciju vrši, kao jedinstven organ, bez unutrašnjih organizacionih jedinica, službi ili odjeljenja.

Općinskim pravobranilaštvom neposredno rukovodi Općinski pravobranilac, a u slučaju spriječenosti, odsutnosti ili po nalogu Općinskog pravobranioca vršenje poslova iz nadležnosti pravobranilaštva obavlja Zamjenik Općinskog pravobranioca.

Pravilnikom su predviđena tri radna mjesta i to.

- Općinski pravobranilac (VSS) - 1 izvršilac,
- Zamjenik Općinskog pravobranioca (VSS) - 1 izvršilac i
- Referent za stručne i administrativne poslove (SSS) 1 izvršilac.

U 2017. godini su u Općinskom pravobranilaštvu stalno bila zaposlena dva lica i to Općinski pravobranilac i Referent za stručne i administrativne poslove.

3.) SREDSTVA ZA RAD I MATERIJALNI TROŠKOVI

U pogledu prostorija za rad Općinsko pravobranilaštvo raspolaže sa dvije kancelarije, sa kancelarijskim namještajem i opremom, koje s obzirom na broj zaposlenih odgovaraju potrebama ovog organa. Na raspolaganju su nam dva kompjutera sa štampačima. Uvezani smo u kompjuterski informacijski sistem za praćenje predmeta, sa stalnom mogućnosti konekcije na internet.

U slučaju potrebe Općinskom pravobranilaštvu je na raspolaganju jedno vozilo od vozila koje koriste ostale općinske službe.

U navedenom izvještajnom periodu Općinsko pravobranilaštvo je imalo slijedeće materijalne troškove:

			Ekonom -ski kod	Izdaci	Rebalans za 2017.	Izvršeno u 2017.	Index %
F.klas.	Gl.grupa	pozicija					
0330							
	611000	1	611111	Bruto plaće sa porezom	61.300	59.594	97,22
		1	611221	Naknada za topli obrok	3.700	3.536	95,57
		1	611224	Regres za god. odmor	850	832	97,88
	612000	1	612111	Doprinosi na plaću	6.400	6.256	97,75
	613100	2	613115	Putni troškovi	269	269	100,00
	613300	4	613311	Izdaci za telefon	360	330	91,67
	613400	5	613411	Administrativni mater.	800	402	50,25
	613500		613511	Benzin	300		0,00
	613900	10	613914	Usluge reprezentacije	514	514	100,00
				Ukupni izdaci	74.382	71.922	96,69

4.) PREGLED, STANJE I STRUKTURA PREDMETA

Ovim izvještajem, tabelarno su prikazani podaci o rješavanju predmeta u svim oblastima u kojima postupa, Općinski pravobranilac, ukupan broj predmeta u radu, sa pokazateljem stanja riješenih i neriješenih predmeta na dan 31.12.2017.godine.

Za potpunije razumijevanje podataka iz tabela mora se dati pojašnjenje da se na osnovu Pravilnika o poslovanju i vođenju evidencija u Pravobranilaštvu Ministra pravde Tuzlanskog kantona, predmeti iz ranijih godina koji nisu okončani prenose u tekuću godinu. Iz navedenog razloga u ovom izvještaju u tabelama se pojavljuju i predmeti iz ranijih godina koji su preneseni u rad u 2016. godinu.

U tabelama koje su u prilogu, prikazani su predmeti u radu po oblastima rada, a koja imaju slijedeće oznake:

- "P"- parnični predmeti u kojima Općinsko pravobranilaštvo zastupa stranku u parničnom postupku u svojstvu tužitelja, tuženog ili umješaka, u vanparničnom postupku u svojstvu predlagača ili protivnika i u krivičnom postupku povodom postavljenog imovinsko- pravnog zahtjeva.
- "U"- predmeti u upravnom postupku i upravnom sporu, u kojima Općinsko pravobranilaštvo zastupa stranku.
- "I" - predmeti u kojima Općinsko pravobranilaštvo zastupa stranku u izvršnom postupku u svojstvu tražioca izvršenja, izvršenika ili učesnika.
- "M"- zahtjevi organa i pravnih lica koje Općinsko pravobranilaštvo zastupa radi davanja pravnog mišljenja i pružanja druge pravne pomoći u vezi sa zaključivanjem imovinsko-pravnih ugovora.
- "Op"-poslovi uprave u Općinskom pravobranilaštvu (organizacioni poslovi, opća uputstva i raspisi, statistika i izvještaji, finansijsko-materijalno poslovanje i poslovi u vezi radnog odnosa).
- "Pn"- predmeti prethodnog sporazumijevanja povodom zahtjeva stranaka za naknadu štete od organa i pravnih lica koje zastupa Općinsko pravobranilaštvo i
- "R" predmeti-pismena koja se ne upisuju ni u jedan drugi upisnik.

Pored toga što su predmeti razvrstani po oblastima u tabelama su dati podaci o strankama, vrijednosti spora, поближе obrazloženje vrste predmeta, te stanje u kojem se pojedinačno predmeti nalaze u pogledu postupka u trenutku predaje izvještaja.

Iz table br.1. vidljivo je da je parničnih predmeta u 2017. godini riješeno ukupno 3, po jedan predmet iz 2010., 2011. i 2015.godine.

Za ove predmete je karakteristično da je u svim slučajevima Općina Gračanica bila tužena strana, da se u ovim slučajevima radi o tužbama radi utvrđivanje prava vlasništva i upisa u zemljišne knjige vanknjižnog vlasnika i jedan predmet naplata dugovanja.

Iz tabele br.2. može se vidjeti da je parničnih predmeta neriješenih u 2017. godini bilo ukupno 20 od kojih je 16 predmeta iz ranijih godina i to po jedan predmet iz 2005., 2011., 2013. i 2016. godine, po 2 predmeta iz 2002. i 2003. godine, 8 predmeta iz 2015. dok su 4 predmeta zaprimljena u 2017. godini. U pogledu trenutnog procesnog statusa ovih predmeta karakteristično je da se za 4 predmeta čeka zakazivanje pripremnih ročišta, za jedan predmet se čeka okončanje upravnog postupka, za 9 predmeta čekaju se odluke drugostepenog suda po žalbama, za dva predmeta čeka se odluka Vrhovnog suda FBiH, a za dva predmeta odluka Ustavnog suda BiH po podnesenoj apelaciji, dok su dva predmeta okončana u 2018. godini.

Struktura neriješenih parničnih predmeta u odnosu na prošlu godinu bitno se nije promijenila, većinom se radi o tužbama za naknadu štete i utvrđivanje prava vlasništva i pravnih odnosa, za naplatu dugovanja, te o tužbama iz radnih sporova.

Općina Gračanica je u svojstvu tužene u svim predmetima a ukupni utuženi iznos prema istaknutim vrijednostima spora u tužbama iznosi 923.354,26 KM.

Ovo pravobranilaštvo u svom radu posvećuje izuzetnu pažnju prethodnom sporazumijevanju koje se sastoji u preduzimanju odgovarajućih mjera za sporazumno rješavanje spornih odnosa između stranaka koje zastupa ovo pravobranilaštvo i drugih subjekata.

Iz tabele br.3. da se uočiti da je upravnih predmeta u 2017. godini riješeno ukupno 8 predmeta od kojih je jedan predmet iz 2015., dva predmeta iz 2016. godine, dok je 5 riješenih predmeta zaprimljeno u 2017. godini.

U pogledu prirode ovih predmeta ovdje se većinom radi o predmetima povodom zahtjeva za promjenu statusa nepokretnosti u opštoj upotrebi, ispravka greške u katastarskom operatu, dok je u dva predmeta pokrenut upravni spor radi poništenja rješenja Ministarstva poljoprivrede, šumarstva i vodoprivrede Tuzlanskog kantona vezano za privatizaciju komunalnih preduzeća.

Vezano za upravne predmete značajno je naglasiti da je donesen Zakon o stvarnim pravima koji je objavljen u „Službenim novinama FBiH“, broj 66 od 28.08.2013. godine koji je stupio na snagu 05.09.2013. godine a počinje se primjenjivati od 05.03.2014. godine, koji je reformski propis u ovoj oblasti, jer određuje samo jednu vrstu prava vlasništva bez obzira na nosioce prava vlasništva. Početkom primjene ovog zakona prestao je da važi između ostalih i Zakon o uzurpacijama („Službeni list SR BiH“, br. 6/78), što znači da Općinski pravobranilac u pogledu uzurpacija odnosno samovlasnog zauzimanja državnog zemljišta neće moći preduzimati mjere i aktivnosti odnosno podnositi zahtjev za raspravljanje uzurpacije zemljišta u opštoj upotrebi u skladu sa Zakonom o uzurpacijama. Međutim, predmeti uzurpacija koji su zatečeni u radu početkom primjene Zakona o stvarnim pravima u skladu sa čl. 372. ovog

zakona okončat će se po odredbama Zakona o uzurpacijama. Članom 7. Zakona o stvarnim pravima je regulisano da će način upravljanja općim i javnim dobrima biti određen posebnim zakonom.

Iz tabele br.4. se može primjetiti da je upravnih predmeta neriješenih u 2017. godini bilo ukupno 18 od čega je 17 predmeta iz ranijih godina odnosno iz perioda 2002. – 2016. god., dok je jedan predmet iz 2017. godine. Za sve ove neokončane predmete je karakteristično da se većinom radi o predmetima po zahtjevima za raspravljanje novih uzurpacija za koje se čekaju donošenja rješenja o utvrđivanju uzurpacija ili zaključci o nastavku postupka od strane Službe za prostorno uređenje, geodetske i imovinsko-pravne poslove, dok se u tri predmeta vodi upravni spor, većinom radi poništenja rješenja Kantonalne Agencije za privatizaciju Tuzlanskog kantona.

Iz tabele br.5. je uočljivo da je izvršnih predmeta u 2017. godini riješen jedan predmet i po svojoj prirodi se odnosi na novčano izvršenje odnosno naplata dugovanja.

Iz tabele br.6. se može primjetiti da je izvršnih predmeta u 2017. godini neriješeno ukupno 22 i svi predmeti su iz ranijih godina i po svojoj prirodi u svim predmetima se radi o nenovčanim izvršenjema odnosno o prinudnim izvršenjema rješenja o utvrđenim uzurpacijama imovinsko pravne službe.

U svim ovim predmetima Općina Gračanica je bila u ulozi tražioca izvršenja i svi predmeta se odnose na nenovčano izvršenje odnosno prinudno izvršenje rješenja o utvrđenim uzurpacijama za koje se čeka prinudno izvršenje rješenja od strane Službe za prostorno uređenje, geodetske i imovinsko-pravne poslove.

Iz tabele br.7. vidljivo je da je predmeta sa oznakom "M" u 2017. godini riješeno ukupno 113 i svi predmeti su iz 2017. godine.

U pogledu prirode ovih predmeta ovde se većinom radi o predmetima u kojima su društvena pravna lica, općinski organi i javne ustanove, ugovore o prometu nekretnina i ugovore o javnoj nabavci dostavljali na potvrdu odnosno mišljenje Općinskom pravobraniocu, te o zahtjevima Službe za prostorno uređenje, geodetske i imovinsko-pravne poslove, za dostavu pravnog mišljenja Općinskog pravobranioca o predloženoj dodjeli neizgrađenog građevinskog zemljišta za gradnju.

Na ovaj način su ispoštovane odredbe Zakona o pravobranilaštvu («Sl.novine TK-a», br.4/04, 5/08 i 2/14) gdje je u čl. 8. i 15. određeno da Općinsko pravobranilaštvo obavlja pravnu zaštitu imovine i imovinskih interesa Općine Gračanica, općinskih organa i pravnih osoba koje osniva Općina Gračanica, te da su ove organizacije obavezne dostaviti ugovore imovinsko-pravne prirode na saglasnost Općinskom pravobraniocu ako vrijednost stvari ili imovinskih prava iz ugovora prelazi 2.000,00 KM, kao i odredbe Zakona o građevinskom zemljištu kojim je određeno da kontrolu zakonitosti dodjele neizgrađenog građevinskog zemljišta vrši Općinski pravobranilac.

Takođe se može zapaziti da nema neriješenih predmeta sa ovom oznakom.

Iz tabele br. 8. može se vidjeti da je predmeta sa oznakom "Op" u 2017. god. riješeno ukupno 27 i da se radi o predmetima u kojima je Općinski pravobranilac dostavljao određene informacije, podatke ili davao obavještenje, kao i predmetima u kojima je od Općine Gračanica ili Općinskog pravobranilaštva tražena dostava informacija. Takođe se može zapaziti da nema neriješenih predmeta sa ovom oznakom.

Iz tabele br.9. se može primijetiti da se **u izvještajnom periodu u odnosu na period prije 2016. godine znatno povećao broj predmeta sa oznakom "R". U 2017. godini riješeno je ukupno 166, može se zapaziti da nema neriješenih predmeta i da se većinom radi o predmetima po Projektu harmonizacije-usaglašavanja podataka o nekretninama katastra i zemljišne knjige** te predmetima u kojima se Općinski pravobranilac obavještava o održavanju sjednica Udruženja pravobranilaca u FBiH.

Iz tabele br.10. da se uočiti da je predmeta sa oznakom "Pn" u 2017. godini riješeno ukupno 2 i da nema neriješenih predmeta.

U tabeli br. 11. dat je zbirni pregled predmeta u radu, riješenih i neriješenih predmeta u 2017. godini gdje je vidljivo da je u izvještajnom periodu, u radu ukupno bilo 380 predmeta, da je postupak okončan u 320 predmeta, što u postocima izraženo u odnosu na ukupan priliv predmeta u toj godini (u 2017. godini zaprimljeno 319 predmeta) riješenost predmeta iznosi 100,31 %, dok je na kraju izvještajnog perioda ostalo neriješeno 60 predmet koji su preneseni u rad u 2018.godinu, što u postocima izraženo riješenost predmeta u odnosu na ukupan broj predmeta u radu iznosi 84,21 %.

Iz iznesenog se može zaključiti da je Općinsko pravobranilaštvo, u izvještajnom periodu imalo ukupno 380 predmeta u radu (61 predmet prenesen iz prethodne godine i 319 predmeta zaprimljenih u 2017. godini) i to u svim oblastima u kojima Općinski pravobranilac preduzima Zakonom određene mjere i pravna sredstva radi zaštite imovine i imovinskih interesa Općine Gračanica u skladu sa Zakonom o pravobranilaštvu ("Sl. novine TK", broj: 4/04, 5/08 i 2/14), što je u odnosu na 2015. godinu povećanje broja predmeta u radu za 176 predmeta od čega je 161 predmet po Projektu harmonizacije-usaglašavanja podataka o nekretninama katastra i zemljišne knjige.

Svi neriješeni predmeti su, kao što je već prezentirano, iz oblasti parničnog, izvršnog i upravnog postupka njih 60, za koje je su postupci u toku i dinamika rješavanja ovih predmeta ovisi o radu sudova i drugih organa kod kojih se vode ovi postupci, a ne od rada ovog pravobranilaštva.

U postocima neriješenost predmeta direktno vezanih za rad sudova i drugih organa u odnosu na ukupan broj predmeta u radu u 2017. godini je 15,79 % te je u cjelini gledajući ažurnost rada Općinskog pravobranilaštva na zavidnom nivou uvažavajući sve specifičnosti postupaka, poslova i zadataka koje Općinski pravobranilac preduzima u tim postupcima kao i dužinu trajanja pojedinih postupaka i predmeta pred sudovima i drugim organima.

Uloga pravobranilaštva se ogleda i u zastupanju stranaka pred sudovima i drugim organima, te je pravobranilac u izvještajnom periodu zastupao Općinu Gračanica u

raspravama pred Općinskim sudom u Gračanici, Tuzli i Gradačcu, Kantonalnim sudom u Tuzli, te u raspravama pred organom uprave.

5.) OCJENA I PRIJEDLOZI MJERA

Generalno gledajući, od strane Općinskog vijeća i Načelnika Općine su obezbjeđene sve materijalne i organizacione pretpostavke i podrška za rad Općinskog pravobranilaštva za obavljanje njegove ustavom i zakonom određene uloge na zaštiti imovine i imovinskih interesa Općine Gračanica, te smatramo da je Općinsko pravobranilaštvo i u 2017. godini opravdalo povjerenje dato kroz ovu potporu imajući u vidu da **na kraju izvještajnog perioda nema neriješenih predmeta izuzev predmeta koji su u radu kod drugih organa.**

U izvještajnom periodu, Općinsko pravobranilaštvo se angažovalo na rješavanju predmeta u svim oblastima, sa posebnim težištem na rješavanju predmeta iz ranijih godina, što je rezultiralo smanjenjem broja neriješenih parničnih predmeta.

Vidljivo je da je Općinsko pravobranilaštvo imalo znatan broj predmeta u radu i da je veći dio tih predmeta riješen ali se isto tako da zaključiti da je reforma pravosuđa na direktan način uticala na broj riješenih predmeta i u 2017. godini.

Sve rasprave u parničnom postupku zakazane do izbora sudija, po izboru sudaca su odgođene, u predmetima Općinskog suda Tuzla zbog prestanka mandata uređujućeg sudije rasprave su odgođene na neodređeno vrijeme, u većini predmeta postupak je vraćen u početnu fazu, a poznato je da takve predmete sudovi uzimaju u rad prema Planu rješavanja predmeta iz ranijih godina tako da iste ne rješavaju u zakonom utvrđenim rokovima. **Posljedica toga je da u radu u ovom pravobranilaštvu još uvijek ima predmeta iz ranijih godina za koja nisu zakazana pripremna ročišta.**

Takođe napominjemo, da dinamika rješavanja upravnih predmeta, isključivo zavisi od rada drugih službi kao što je prvenstveno Služba za prostorno uređenje, geodetske i imovinsko-pravne poslove.

Ovdje smatramo neophodnim istaknuti određene probleme sa kojima se ovaj organ susreće u radu. Iz tabelarnog pregleda predmeta tako i opisnog dijela stanja predmeta može se uočiti da Služba za prostorno uređenje na inicijativu Općinskog pravobranilaštva rješava predmete po zahtjevima za utvrđivanja postojanja novih uzurpacija kojim se na najdirektniji način štiti općinska imovina i imovinski interesi Općine Gračanica. Naime, velik je broj ranije zaprimljenih inicijativa građana za raspravljanje novih uzurpacija zemljišta u državnoj svojini i pravobranilaštvo je odgovorilo svakom podnesenom zahtjevu odnosno inicijativi, te kod nadležne Službe pokrenulo postupke za raspravljanje novih uzurpacija.

Međutim, na kraju izvještajnog perioda ostalo je neriješeno 40 upravnih predmeta za koja se čeka donošenje rješenja o uzurpaciji ili samo prinudno izvršenje od Službe za prostorno uređenje, geodetske i imovinsko-pravne poslove, koji predmeti će se u skladu sa

odredbama čl. 372. Zakona o stvarnim pravima okončati po odredbama Zakona o uzurpacijama, tako da nemožemo biti nikako zadovoljni sa obimom rješavanja ovih predmeta.

U narednom periodu kroz rad prvenstveno Općinskog pravobranioca uz pomoć nadležnih službi Općine Gračanica treba ostvariti slijedeće:

- poduzimanje mjera i aktivnosti radi pravne zaštite imovine i imovinskih interesa Općine Gračanica i općinskih organa
- afirmisati sve vidove preventivne djelatnosti Pravobranilaštva, kao što su sporazumno rješavanje spornih odnosa.
- nastaviti aktivnosti na okončanju zaostalih predmeta uzurpacija,
- angažovati se u granicama zakonskih mogućnosti ka okončanju zaostalih parničnih predmeta,
- izvršiti utuživanje lica koja imaju novčana dugovanja prema Općini Gračanica,
- insistirati na dostavi ugovora na ovjeru i mišljenje Općinskom pravobraniocu u skladu sa zakonskim propisima.

Broj: Op-13/18

OPĆINSKI PRAVOBRANILAC

Jasminka Imširović